

Headline	Industri kayu kayan bakal hadapi masalah bekalan		
MediaTitle	Utusan Sarawak		
Date	14 Nov 2012	Color	Black/white
Section	TEMPATAN	Circulation	37,981
Page No	1	Readership	113,943
Language	Malay	ArticleSize	207 cm <sup>2</sup>
Journalist	N/A	AdValue	RM 470
Frequency	Daily	PR Value	RM 1,410



# Industri kayu-kayan bakal hadapi masalah bekalan

FENNY SILONG

KOTA SAMARAHAN, Selasa — Satu seminar kayu getah, akasia, palma dan spesies perintis industri perkayuan (GAPPS) yang dianjurkan Institut Penyelidikan Perhutanan Malaysia (FRIM) dengan kerjasama Perbadanan Kemajuan Perusahaan Kayu Sarawak (Pusaka) dan Universiti Malaysia Sarawak (Unimas) akan diadakan pada 19 hingga 20 November 2012 di Hotel Pullman.

Pengarah FRIM, Dr. Rahim Sudin berkata, seminar ini bertujuan mempromosikan dan meneroka penggunaan sumber alternatif kepada spesies pokok kayu hutan sebagai bahan mentah untuk pengeluaran produk-produk berasaskan kayu sekali gus mengurangkan kadar penebangan hutan.

“Industri kayu-kayan merupakan salah satu sumber pendapatan penting bagi Malaysia sejak beberapa dekad lalu dengan menyumbang nilai eksport sekitar RM20 bilion setahun dan ini merupakan seminar ketiga di antara ketiga-tiga agensi ini,” jelasnya semasa sidang media di Unimas, hari ini.

Beliau menambah, industri ini dijangka menghadapi masalah mendapatkan bekalan kayu-kayan mencukupi dalam masa terdekat dan usaha pemuliharaan hutan dipertingkatkan dengan sumber yang berpotensi seperti getah, akasia, palma dan lain-lain.

Timbalan Pengurus Besar Pusaka, Hashim Bojet berkata,

Sarawak mengeksport RM30 juta perabot dan masih banyak peluang untuk membangunkan industri perabot di negeri ini.

“Kita mempunyai satu juta hektar akasia dan sebahagian digunakan untuk industri palpa dan kertas,” katanya.

Sementara itu, Pengarah Institut Reka Cipta Inovasi (InDI) Unimas, Dr. Khairul Aidil Azlin Abdul Rahman berkata, pihaknya mereka bentuk perabot dengan mempelbagaikan bahan mentah.

“Kita berusaha menghasilkan produk yang bermutu tinggi di samping menambah pendapatan kepada masyarakat setempat. Kita mensasarkan sebanyak 20 peratus untuk bahan alternatif dan itu akan ditambah pada masa akan datang,” ujunya.

Seminar ini bakal dirasmikan oleh Menteri Sumber Asli dan Alam Sekitar (NREB), Dato Sri Douglas Uggah Embas dan akan mengumpulkan lebih daripada 100 orang peserta dari organisasi berkaitan dalam bidang perhutanan, penyelidik, pengusaha perabot untuk berkongsi maklumat serta membincangkan isu-isu yang berkaitan.

Justeru, seminar ini akan membentangkan hasil-hasil pembangunan dan penyelidikan (R&D) dan komersialisasi bagi kayu getah, palma, akasia dan spesies perintis sebagai bahan alternatif untuk industri perkayuan masa hadapan.

Seminar ini adalah percuma dan terbuka kepada orang ramai. Sebarang pertanyaan, sila hubungi Siti Emiza Misi (082-473000 / ct\_emiza@pusaka.gov.my) atau Yanti Abdul Kadir (03-62797705 / yanti@frim.gov.my).